


地800  
8463  
1910



西藏日記

登录号 8028  
函 1 册

援庵先生 賜存

晚學 趙貞信 敬贈

西藏日記

邊疆禁書甲集之四

中華民國廿六年二月  
馬寅初學會據江  
安傅氏藏稿本印

果親王手蹟

奏章

二十五日在奉寧大宴

二十六日早微雪

金帛等物

二十七日至三十日

余親往觀射

二十七日不至三十日早晨見遠嶺喇

喇日 至中 接見俄大喇喇等

諸酋長王司者人等以

金帛有差

允禮傳清史稿

果毅親王允禮聖祖第十七子康熙四十四年從幸塞外自是輒遊雍正元年封果郡王管理藩院事三年諭曰果郡王實心為國操守清廉宜給親王俸護衛亦如之班在順承郡王上六年進親王七年命管工部事八年命總理戶部三庫十一年授宗令管戶部十二年命赴秦甯送達賴喇嘛還西藏循途巡閱諸省駐防及綠營兵十三年還京師命辦理苗疆事務世宗疾大漸受遺詔輔政高宗即位命總理事務解宗令管刑部尋賜親王雙俸免宴見叩拜密疏請蠲江南諸省民欠漕項蠲課學祖祿稅允之諭曰果親王秉性忠直皇考所信任外閒頗疑其嚴厲今觀密奏足見其存心寬厚特以宣示九卿允禮體弱上命在邸治事越數日一八直乾隆元年坐事罷雙俸三年正月病篤遣和親王弘晝往視二月薨上震悼即日親臨其喪子謚無子莊親王允祿等請以世宗第六子弘瞻為之後

# 西藏日記序

聖天子聲教四訖德洋汪濊車書文物之盛超邁前古甲寅冬予奉命使泰寧輿程往來凡六越月自冀北山右歷陝及川綿亘四省凡五千九百餘里考山川之源委誌風景之異同日見耳聞排日紀錄道中叨蒙訓旨遠頒恩賚疊沛皇華原隰屢軫聖慈感切之忱尤難罄述昔揚雄提槩懷鉛疇訪言土俗況國朝幅員式廓編氓歸化予得憑茲輶軒周覽形勝尉候亭障六合一家咸頌皇仁而服德教所得不既多乎爰從暇日區爲上下二卷較韋莊之峽程記范成大之攬轡駘鸞二錄詞義差可髣髴以備采風之故實云爾是爲序

西藏日記序

一  
禹貢學會  
邊疆叢書

# 西藏日記卷上

陳垣同志遺書



清 允禮 撰

雍正十二年 月 日奉旨前往泰寧與達賴喇嘛相見兼命閱視經過地方營伍隨於十月朔後五日陛辭自海淀起程回望觚棱心增紆戀西山送翠馬首戒塗行三十里許過蘆溝橋當朝會往來孔道建自金明昌初橫跨二百餘步翼以石欄雕刻金貌數百枚其下爲桑乾河本日渾河亦曰黑水俗稱小黃河色黃濁而流勁駛發源山西渾源州從靜海縣直沽入海蘇軾詩北渡桑乾冰欲結蓋是時未置橋也又三十里抵良鄉宿天氣晴和初冬尙暖穰稷登場村墟如畫縣東北燎石岡上有多寶佛塔五級玲瓏舊傳塔記云隋建訪覓碑版不可得

初七日發良鄉禮佛於弘恩寺過寶店琉璃河一名劉李河水經注謂之聖水元和志謂之迴城水流合胡良拒馬二河下有鎮水鐵柱俗傳唐末王彥章嘗甚謬是日宿涿州本古涿鹿之野史記酈商食邑于涿號涿侯卽此地有督亢陂隋書食貨志齊皇建中開幽州督亢舊陂歲收稻粟數十萬石西南爲樓桑村漢昭烈故居

## 西藏日記卷上

一 禹貢學會  
邊疆叢書

初八日次定興縣北河村卽拒馬河也舊有橋明萬曆初建崇禎時水溢橋圯今遇秋汛卮舟以渡爲涑易沙三水合流處名河陽渡至冬月水縮仍架草橋迤北有十五汲九汲等村按舊志九及十五及由范陽故城得名汲及蓋音近而訛

初九日黎明抵安肅縣縣有梁門口輿地記云南昌水所匯今無此水按水經注易水東分爲梁門陂是南昌卽易水以流近縣南故改名又有雞爪泉湧分三派流爲河保定總督李衛來迎午後至省治閱兵北關外宿蓮花池別業元萬戶張柔故基也柔佐元開國以勛績聞

初十日再閱兵教場申時發保定過陘陽驛及方順橋其河本名順水源出完縣伊祁山曰濡水流入清苑徐河是日兼程行歷慶都界抵清風店宿已二更矣

十一日過唐河河本澧水自唐縣流入一曰清水有渡是日天陰凝雪至定州大雪晚次新樂古中山地也有伏羲城在西南

十二日晴過藁城之伏城驛抵真定府治校閱總兵標營將士於教場宿隆興寺

十三日登佛香閣瞻拜法身高七丈餘紺鬚眉爲丈夫相千臂兩足手執兵仗閣三層廣八十楹中空洞四圍開牖拾級而上及頂纔見菩薩面目寺剏隋開皇中本朝康熙三十七年

聖祖仁皇帝遣官重修御製碑文勒在貞石是日復閱武小教場事畢啓行渡滹沱河北魏謂之清寧河自山西繁峙導源下流至直沽入海按周禮并州其川滹沱朱子謂禹貢恆衛既從之衛卽滹沱水經無滹沱專篇散見於易滹巨馬諸水中今滹沱南注非復昔日經流舊志以雷塘溝之合滹沱者爲古衛水明楊慎又指九河之徒駭爲滹沱大約水道變遷後人多懸揣傳會耳宿獲鹿縣

十四日過井陘口有關曰土門太行八陘第五陘也陳餘聚兵拒韓信處上爲井陘山俗呼韓信臺涉微水抵井陘縣治南關外有綿蔓水昔信擊趙使萬人先行背水爲陣謂此水也宿核桃園雨雪

十五日天陰無雪出固關明正德時改建乃燕晉控扼要地過關卽山右界矣岡嶺環紆石子如升斗大散漫谿石間稜稜蟲蟲寒風逼人馬毛縮蜩抵樂平栢井驛及西郊鋪有試劍峰舊建淮陰廟於上宿平定州州在萬山中鳥道盤空一綫陡落其東浮山煉石竈土人傳女媧補天處荒誕不足信

十六日仍陰微霰過黑沙嶺歷孟縣芹泉驛宿壽陽有鴉峪一名秀谷通鑑晉天福九年劉智遠敗契丹秀谷是也山路崎嶇多泥淖余諭守令前途揭示天寒雨雪毋勞民修治道路

西藏日記卷上

二

禹貢學會  
邊疆叢書

十七日薄陰微日憩太安驛晉撫石麟率官弁送於石帖村晚宿榆次王胡鎮有堡城左傳石言於晉魏榆今榆次是

十八日微陰閱太原營兵於王胡鎮南余乘馬馳射村民環集夾觀雜拜馬首是夕宿徐溝堯城鎮相傳堯自涿鹿遷此

十九日初晴過祁縣賈令鎮左傳昭公二十八年晉賈辛爲祁大夫鎮蓋以辛而名其縣治祁奚封邑也有扁曰舅犯故里又有漢司徒王允祠是夕宿平遙五里莊

二十日至平遙縣治觀三清觀漢栢城東有尹吉甫將臺按吉甫伐獫狁至太原在隴右平涼境朱傳誤以晉之太原當之後人因附會古蹟耳憩介休張蘭鎮唐書太宗追宋金剛至張蘭堡卽此過郭家村距縣治二里許有林宗故宅及墓墓前存漢槐一株清風襲人髣髴墊巾風概其縣以介子推名今有祠在西關城內又有文潞公祠遂宿義棠橋汾水所經也有驛西南爲雀鼠谷唐開元時北巡并州出此路

二十一日過靈石冷泉關關爲平陽咽喉李商隱有寒食行次冷泉驛詩蓋舊驛也至水頭村遇烏斯藏使臣延見行臺登韓侯嶺有廟踰嶺宿仁義鎮相傳劉武周築此仁義河經流其下源出沁源縣流入汾

二十二日過大會頭上霍州逍遙嶺憩施莊再憩州治州以霍山名北關外有扁曰依霍太岳也禹貢既修太原至於岳陽又壺口雷首至於太岳指此趙襄子臣原過得朱書唐高祖舉義白衣老父詣軍門傳神語助兵皆其地也今存原過祠宋老生墓是夕宿新置鋪

二十三日至趙城塗遇羌使延見之縣有媯皇陵趙簡子墓過洪洞有碣曰師曠故里曰叔向食邑又有臯陶廟蘭相如墓縣北惠遠橋有通霍渠南爲聚瑞橋澗水如帶西匯入汾臨汾高河橋即澇水三橋之水並資溉田抵平陽府治宿

二十四日謁帝堯廟校閱營兵於廟左演武場

二十五日發平陽憩襄陵趙曲鎮有瀉溝澗過曲沃蒙城驛北有碣曰虞臣伯益故里曰文中子故里宿高縣鎮

二十六日憩侯馬驛過隘口亦曰厄口晉所置鐵嶺關也出口有碣曰裴晉公故里再憩聞喜上東鎮宿縣治故桐鄉也漢書元鼎六年將幸緱氏至左邑桐鄉聞南粵破以爲聞喜縣其故城在今縣東南東又有碣曰郭璞讀書處

二十七日憩夏縣水頭鎮晚宿安邑運城

二十八日登歌薰樓觀鹽池池周百二十里宋分東西爲二各置場務明分東西中爲三池

西藏日記卷上

三

禹貢學會  
邊疆叢書

東中屬安邑西屬解州水經注水出石鹽自然印成洵坤輿中神異物也唐賜名寶應靈慶池今池北土阜有神廟坊曰地寶天成南臨池即歌薰樓坊曰舜彈琴處是日抵解州謁關聖廟宿州邸其東關有碣曰風后故里

二十九日晨起朝服赴關聖廟拜萬壽牌

十一月朔發解州憩虞鄉再憩七級鎮宿蒲東之寺坡底

初二日遊普救寺隨閩州兵演武場蒲故蒲坂也北負關陝南阻大河憩匱河鎮晉界止此三晉本堯舜禹舊都季札觀樂夙有思深之歎兼又接壤畿封濡煦皇仁匪伊朝夕故土俗最淳樸敦厚年穀屢豐米直每斗率銀錢許人民樂業所在鼓腹擊壤是日抵風陵渡口一曰風陵堆史記作風陵水經注謂之風墪按閩鄉載女媯墓女媯風姓故名爰具牲犧祭河神既渡宿陝西潼關縣是日也風恬水激暖若三春

初三日登麒麟山觀元季鐵鐘山爲縣城盤跨扼河之衝故潼關又名衝關晉豫雍三省分界處也故潼關在華嶽北隋移縣東即古城關唐移北臨河則今縣治經華嶽廟登閣見三峰削成翠落天半遂遊華山蜿蜒而登至青軻坪坪在山谷盡處陟嶽之初級也二鼓回華嶽鎮宿是日恭接恩賜食物

初四日再登嶽廟之閣摹畫三峰勝景因思昔時王蒙知泰安州張絹素廳壁日對泰山輿到輒一舉筆圖成示陳汝言值大雪汝言張小弓夾粉筆彈之遂爲雪景一時推爲神筆王陳以繪事擅藝千古然必臨摹真景纔肖天然之趣余今亦同此意耳至華陰縣憇敷水唐驛也白居易詩春風敷水店門前水經注敷水南出石山之敷谷北流注于渭又名羅敷水有謂即樂府羅敷者悞羅敷趙人今邯鄲別有羅敷潭是日過華州柳子鎮宿州治華陰東有碣曰王猛墓州東有碣曰唐汾陽王故里曰陳希夷墜驢處

初五日憇赤水即古灌水水經注水出石脆之山東北流與黑水合北流注于渭今名高谷水再憇渭南出豐原驛過澗河即首水水經注渭水又東首水自倒虎山南總五水單流北注有澗橋一名萬里橋其地有半日村唐郎士元別業在焉宿零口亦曰冷口冷水至此入渭水經注冷水出浮肺山宋敏求長安志零口水濁利灌溉

初六日過臨潼之新豐東有碣曰南原鴻門按史記注新豐古城東未至戲亭道南有斷原南北洞開即鴻門今臨潼有戲水鋪鴻門亭是其蹟也劉項遺壘都付榛翳久矣至縣治西安將軍督撫率官弁來迎延見行臺畢因登驪山之巔有老子祠刻玉爲像晚浴于湯池水經注魚池水之西南有溫泉世以療疾卽此唐開元中建華清宮其上築會昌城置百司公卿邸第徒增繁侈今池水四周鑿石如環中一小石鑿七竅出泉飛流瑩澈前滌神襟覺山水有清音耳宿臨潼有張橫渠講學坊

初七日憇咸寧灞橋鎮水經注霸水歷白鹿原東又北入于渭漢書注霸水古曰茲水秦穆公更名以章霸功唐時多於此橋折柳送別岑參詩山開灞水北雨過杜陵西今縣治有少陵原樊川黃陂猶存過灞河至灤水三輔黃圖云灤水出藍田北北至霸陵入灞唐詩鹿原陰面灤川渭今府城東北有龍首渠乃導灤水者也終南太一寒翠鬱蒼渭流襟帶澄如匳鏡時督撫標營弁暨滿漢兵列隊出迎進西安長樂門以督署爲行臺延見官弁等

初八日拜發奏章

初九日出安定門演武場校閱督撫等標兵余亦乘馬騎射

初十日發西安憇長安之三橋鎮渡灃水入咸陽界長安志灃水自長安縣界來下流入渭遂過渭水浮橋水經注渭水東與豐水會于矩陰山南水上舊有浮橋三輔黃圖橋在便門外跨渭水亦名中渭橋又曰咸陽橋杜甫詩塵埃不見咸陽橋是也憇縣治過馬跑泉宿興平東關

十一日過興平縣漢之槐里也登西坡謁姜嫄后稷祠有玲瓏石形質甚秀其驛曰白渠本

成國故渠魏衛臻征蜀所開非漢時白渠也今湮廢憇馬嵬鎮唐楊貴妃墓在坡前再憇東扶風鎮宿武功本古郿國堯封后稷于此漢置釐縣釐即郿

十二日憇扶風縣西有班固馬援墓坊曰古美陽城按漢美陽故城在武功西北後魏移置古郿城扶風非故城治所或地界相錯而混再憇岐山縣之益店鎮抵縣治宿登西城北望岐山南眺五丈原按河圖岐山在崑崙東南名地乳漢書注其山兩岐俗呼爲箭栝嶺今日鳳凰山以周初鸞鷲鳴此故名五丈原在石橋山側與寶雞接壤蜀志諸葛亮由斜谷出據五丈原與司馬懿對于渭南即其處

十三日微雨憇鳳翔縣界第五村再憇寶雞邸店鎮西北有瀑布三泉遙望陳倉諸峯與終南太白綿亘羅立雪影暗颭寒颯襟渡汧水水發源隴州自汧陽流入水經注汧水自茲山東南流又東流于渭水是夕宿寶雞縣有坊曰陳倉古道即秦文公祀陳寶處祠在縣東二十里渡汧後所必經也

十四日在寶雞雨止午登北山遊八角寺金臺觀南眺羣峯俯囑渭水山有碣曰雞臺金臺有張三丰祠圖經娑羅泉在縣東二里三丰養真于此惡蛙聲咒之後產蛙不鳴今有碣曰張三丰得道處

西藏日記卷上

五

禹貢學會  
邊疆叢書

十五日天陰無雨過渭河橋及清澗河抵益門鎮鎮西據益門山元平章李思齊築爲入北棧之始備牲帛祀棧道之神過二里關有巡司憇觀音堂歷大散關關東卽和尚原與仙人武休馬嶺畫眉諸關聯絡臂指當秦蜀之喉襟水經注兩當水出陳倉縣之大散嶺昔孔明引兵出散關圖魏吳玠扼和尚原爲宋守英風勁烈山谷爭雄今遺營殘壘唯寒鴉數點出沒耳登煎茶坪坪高二十里石磴峻滑山巔積雪盈尺人馬行雲霧中聞水聲瀾瀾土人云是瀑布聲過石壩鋪一名白鼻孔明曾築寨蘇軾有詩再憇東河橋宿黃牛鋪吳璘以兵援黃牛堡卽此地

十六日天陰微雪冰漸覆地憇鳳縣草涼驛一名草橋邵康節過此有草涼樓詩雪止再憇王家臺宿縣治自縣之斜谷抵褒城之褒谷總曰連雲棧有板閣三千八百餘間華陽國志諸葛亮相蜀鑿石架空爲飛梁閣道然觀張良勸漢高燒絕棧道則自秦漢時已有非孔明剏造也或更加修築不可知

十七日晴出縣西門南折登鳳嶺嶺甚峻石斷斷如編齒馬踏有聲憇心紅鋪橋棧漸多再憇廢邱關一曰費邱晚宿南星鋪自鳳嶺以南始有竹

十八日憇榆林鋪過柴關嶺下嶺入紫柏山卽華陽國志之紫柏坂也地多紫柏有留侯祠

碣回張良辟穀處再憇廟臺宿留壩驛

十九日過畫眉關入馬鞍二十四嶺憇青羊鋪有青羊河水經注水東出馬鞍山歷谷西流至故道城東西流入故道水卽謂諸嶺之水也再憇武關驛卽武休關過河宿褒城馬道驛有馬道河一曰樊河入褒水上有橋故又名樊橋驛有碣曰蕭何追韓信處蓋流俗相傳不經之說也

二十日憇二十里鋪過十里關再憇青橋驛以青橋山而名其北有河西南流入褒水是日始出北棧宿褒城縣治所歷觀音碕褒姒鋪並怪石嵯峨懸崖欲墜江流激射勢如劍拔弩張觀音碕舊名閻王碕康熙中撫臣賈漢復煨石開道始易今名化險爲平行旅稱便雞頭關居山絕頂唐韋莊詩石狀雖如幘山形可類雞是也關下有門卽五丁所開石牛道名褒谷口有七盤嶺自褒以西柑橘甚賤民多稻田服用水牛

二十一日憇祁店再憇沔縣黃沙驛有黃沙水按水經注黃沙水北出遠山山谷遂險人跡罕到谿曰五丈谿水側有黃沙屯諸葛亮所開其水南注漢水則驛卽其屯地也是日宿縣治出東關祭武侯廟本蜀校尉習隆等表建渡沔水復祭武侯墓登定軍山水經注沔陽故城南對定軍山武侯遺令葬此又沔東關有馬超墓

西藏日記卷上

六

禹貢學會  
邊疆叢書

二十二日由沔入南棧憇蔡壩再憇青陽唐驛也武元衡有宿青陽驛詩經龍門閣至大安驛舊大安軍治此有大安河源自普明山南流與漢江合九域志謂之金牛驛過驛爲寧羌之烈金壩石櫃閣杜甫龍門閣詩清江下龍門絕壁無尺土石櫃詩石櫃層波上凌虛蕩高壁蓋指漢江也名東漢水按地志烈金壩在嶓冢山下杜佑通典漢中金牛縣嶓冢山禹導漾水東流爲漢水然漾水發源甚微合五丁峽諸水流爲沔厥流漸大耳又有嘉陵江名西漢水在州境西北是日過五丁關峽曰五丁峽亦曰金牛峽兩山夾道曲折如巷石壁千尋松柏交映水從峽中噴薄而出潑潑馬蹄間獐石森羅奇險萬狀遂抵滴水鋪宿

二十三日天陰經柏林驛憇寧羌州治再憇黃壩驛有黃壩水及回水可溉田過七盤關盤折而上其嶺亦曰七盤非褒口之七盤也岑參詩蜀郡路漫漫梁州過七盤又曰五盤杜甫詩五盤雖云險山色佳有餘中有坊曰秦蜀交界下嶺宿磚頭驛川省廣元所轄也陝地土厚水深民多厚重質直易以從教其米直唯省治略昂自鳳翔以西接近川省市價俱平歲收豐稔

二十四日憇神宣驛登黃荆嶺及龍洞背兩峯夾立陡插霄漢嘉木排攢巖壑森幽其間一山如獐龍橫跨鱗脊翕張有水自北流入洞中經二十里始出合嘉陵江是日抵朝天鎮宿

有巡司古籌筆驛也武侯嘗駐軍籌畫于此誦義山猿鳥風雲詩句感惻久之

二十五日具牲帛祭嘉陵江神乘船過廣元界抵昭化宿有桔柏渡距昭化二里一名桔柏潭爲嘉陵白水二江合流處白水即羌水也杜甫桔柏渡詩青冥寒江渡駕竹爲長橋是時曾置竹橋矣兩岸山峽衿束江流波濤迅疾其山石文理詭異埵穴攢簇呀然隴然或尖若筍或圓若毬或若懸瓮或若積瓦或半圓若洞孔或斜壓若頽崖或突若虎攫或隱若獅蹲柳宗元萬石亭白居易太湖石二記所摹狀不盡者在廣元界有洞深邃曰甘露洞石壁斷穴如鋒窠刻浮屠像曰千佛厓厓上鑄至正五六年蒙古名氏俱稱仕蜀經此留記

二十六日過天雄關登牛頭山俗名五里磔盤旋石磴倏忽升降者三十里劍門之險阨也

憩大木塘過劍州高廟鋪歷誌公寺七里坡自坡迤南峯巒環疊柏林甚繁遙望羣山攢削切漢穿雲少近則峭壁廻抱如城郭狀即劍門關也本日梁山又有劍山大小二並鑿石架閣小劍勢尤巉嶮姜維自沓中爲鄧艾所摧還保劍門即此古稱重險之地宿兵屯戍填谷塹山今寰海旌席村墟彌布閣上一僧喃喃誦經爲焚修棲息之所當年爭鋒畫站之場俱證以清淨業因矣中又有大小劍二水分流至兩溪口而合名水會渡一云水回渡杜甫有詩註家泛引水經注之會口當之非也關內碣石多刻唐人舊句是夕宿劍門驛

西藏日記卷上

七

馮貢學會  
邊疆叢書

二十七日自劍門西行登五里坡石磴硤磔盤辟而上憩青樹塘古柏數萬夾道仰窺天罅碧痕一縷過漢陽鋪下憩石洞溝復上坡柏樹漸稀過又手坡循山之半腰下宿劍州亂峯俯仰如笏立石大者如屋廬如象牛小者如盆盎

二十八日出州西門登大坡過清涼橋憩柳池溝舊爲柳溝河沿坡驀磧登頓數十里宿武連驛北周廢縣也西坡古刹曰覺苑有碑二一鑄逍遙樓三字字徑尺餘大曆五年顏魯公書一鑄郭璞曰縣路翠武功貴縣路青武功榮岷山何榜茲地勉忠孝翌聖世慶元丁巳治路種松按岷山何者宋縣令何瑛考劉宋元嘉中僑置武功于此故仍其舊稱但郭璞晉人何以先有武功之目識記譌謬不足信矣蜀中氣候不甚寒崖草帶綠麥苗正青人皆衣單袂山麓紫花含笑燕蝶穿擲往來

二十九日自武連南行石磴曲折十里餘至山頂曰瓦子磔自磔循山行山坡紆復似往仍迴東西迷目平轉三十里憩梓潼上亭鋪再平轉二十里至梓潼廟廟在山巔燬于火復轉磴而下者二十里抵縣治宿棧道竟焉潼江在縣西七里自平武縣流入一名馬閣水有馬閣山舊傳鄧艾伐蜀路出江油見高崖峭壁乃束馬懸車造作棧閣因得通路故山水取名也

三十日出縣南門憇石牛鋪再憇綿州魏城驛西魏之廢縣也過銅馬鋪渡涪江水經注涪水東南流涇涪縣西蓋州本漢涪縣水以此名自江油縣流入州北分二派至彰明廢縣南合流有廉讓二水注之南涇州城西會安昌水入潼川州界謂之內水晉義熙中朱齡石以奇兵從內水向黃虎是也是夕宿綿州西關自梓潼至銅瓦多平山小溪板橋茅舍麥苗芋眠豆藿彌望行者有去險就夷之樂自銅瓦至州治高高下下地勢盤廻爲蜀東北要衝彰明廢縣在州北有李白宅青蓮鄉白所生之地也州產水蘿蔔脆美如梨

十二月朔發綿州憇皂笈鋪再憇德陽羅江驛唐故縣也羅江有二源一曰寧江一曰冷水並自安縣流經驛北匯焉過白馬關相對者爲鹿頭關杜甫有鹿頭關詩山勢自劍門來至此始盡關下落鳳坡有龐士元墓廟宇二重中塑孔明士元像古柏兩株甚森秀經靈龕鎮下坡道路坦平天氣融冶修篁夾岸過綿陽河渡口卽綿水也自綿陽縣流入晚宿德陽治川省督撫來迎

初二日憇漢州之小漢鎮過金雁橋跨雁江水俗稱金雁河自什邡縣流入東南至州城合沅犀河抵州治廣漢驛東南有房公湖一名西湖唐房琯爲刺史所鑿陸游詩繞城鑿湖一百頃島嶼曲折三百里其勝槩可想也過新都彌牟鎮有清白江卽古湔水自新繁縣流

西藏日記卷上

八 禹貢學會 邊疆叢書

入今名彌牟河路左爲武侯八陣圖祠宇巍然按明楊慎記新都之八陣圖其地象城門四啓中列土壘約高三尺耕者或割平經旬復突出今如小豕漫衍不可辨識抵新都縣治漸晚官弁軍民迓者衆乃秉炬入成都

初三日在城都古益州治此西北有石笋二杜甫詩陌上石笋雙高蹲是也舊稱武擔山文翁學堂故址卽今府學

初四日閱馬于箭道出府南門謁昭烈廟遊杜少陵草堂杜詩背郭堂成蔭白茅卽此

初五日校閱營兵于教場

初六日在成都

初七日恭迎上諭及賜物輜軒所歷屢蒙恩賚遠頒彌增感戀是日發成都憇新津之金花橋至隻流舊縣隋置在二江之間故名二江一曰鄴江水經注江水又東南徑武陽縣有鄴江入焉今名金馬河一曰汶江今名簇錦河合于笮橋河並自溫江縣流入南關有碣曰先賢瞿君故里按寰宇記瞿字鵠子後漢犍爲人入峨嵋山得道新津漢犍爲地也過黃水河竹橋再憇花橋鋪過金馬河竹橋竹橋法以竹百餘束橫列河中覆以蘆條護以欄楯袤十餘丈廣丈餘以葦籬約之又編竹爲墩實以石分置四隅復有大墩二對峙上流用巨索繫

橋之脇視水消長以制緩急人馬行則動盪有聲隨波升降亦異觀也是夕宿新津

初八日微雨憩邛州之斜江河其水自大邑縣流入遂宿州治自成都迤西而來瓜疇芋區野花區匝水磴山碓之屬旋轉波中竹高八九丈林中谷谷鳩鳴童穉赤足嬉遊余憑軒寄眺亦忘其爲冬序矣州有文君井及琴臺

初九日晴出州南關過浮橋有邛水一名南河合文井江水經注文井江李冰所導至臨邛縣與僕布水合卽此憩巍峩店一曰臥桂店與蒲江交界再憩名山縣黑竹關宿柏站自邛州浮橋登土坡以抵柏站岡隴平夷稻畦環繞芭蕉竹柏翠碧交映鸚鵡畫眉共語

初十日過洗馬池及白土坎坡勢漸高厥土赤墳石圓而理蠡踰縣治十里入山峽地益險峻復類棧中景象歷金雞關一名雞棟關過孝廉橋旁有高孝廉墓按輿地碑目墓碑漢建安十四年立有二一曰高願字貫方一曰高君實字貫光並舉孝廉世遠年湮不可定爲何人墓也經桐梓林有土司跪迎道左循雅河而西緣山傍岸抵雅州府治宿雅河本名青衣江自蘆山縣流入水經注青衣水出青衣縣西蒙山東與沫水合沫水卽平羌水源出生羌界亦自蘆山流入水流甚急波濤洶湧澎湃而下如河劈華潼潮奔羅剎蜀塞之巨川也跨河有小鐵索橋是日薄陰巴蜀江水沃野土地肥美有竹木果實之饒民俗勤儉米直不過

西藏日記卷上

九

禹貢學會  
邊疆叢書

數分自雅州以後番界交錯越嶠踰山商旅艱阻故米麥漸昂貴

十一日出府南門上坡西南行山勢崢嶸林木叢密陰濛細雨屈折蟻封間赤泥如膏馬蹄黏澁行步以寸計遙見兩山夾峙中如巨門松柏穿柱泉流奔洩地名對巖履棧上下沙石憂摩有聲人多悸恐馬亦喘汗至風木了磴道轉高山禽練雀竦立人行樹底面皴碧色迤西亂山萬笏天日冥蒙洞中大石傾仆星塊瓦鱗紛錯畦畝水覓石罅流怒而噴激錫如雷霆竟一日之力僅行四十五里泥淖顛蹶而至觀音鋪宿焉

十二日過飛龍關雲霧四塞咫尺不辨人馬行三里餘始開霽山路漸燥盤折而下者十五里曰斜麻灣一曰麻柳灣復繞山而轉歷高橋關有高橋水自雅州八步石發源流合榮經二水是日憩新設站抵榮經縣宿

十三日出縣西門越坡跨棧忽上忽下林木愈稠飛泉陡注時見番民持畚鍤治道過鹿角壩經箐口及安樂鋪山愈險峻雲霧沈黑細雨飄瀟猿猱歎啼岩壑應響馬蹄撇振行者相顧失氣噤不敢發聲是夕宿黃泥鋪

十四日過大相嶺舊傳武侯南征經此而名嶺高四十里峰巒屏插四時氛霧噎霾瘴雲充塞居民罕睹日光積雪數尺巖下垂凌長丈許如石筍磴砒玉峯迴映瓊光迸裂寒氣逼射

鬚眉中多虛閣險厓明初景川侯曹震嘗修治以通行旅至今賴之歷小關大關二山長老坪徑摩穹蒼壁色積鐵縈盤綫縷陰飈怒號至九折坂及頂有坊曰漢刺史王尊過此王陽不過此按漢書尊爲益州刺史行部至邛邛九折坂問吏知王陽所畏道叱馭前驅注云在蜀郡嚴道縣今榮經爲漢嚴道縣治有邛來山在西南華陽國志邛崃山本名邛笮故邛人笮人界也巖阻迴曲九折乃至山上或以大關小關即古邛來蓋亂山綿絡都有是稱矣自踰嶺後雲開日現復別具一境界又轉折下二十四盤風磴竊曲長蘿卷舒抵清溪縣宿縣本古西夷笮都侯國唐以後爲黎州本朝置黎大所雍正八年建縣城築山上形勢陡峻有大渡河即古泅水宋藝祖以玉斧畫界處也

十五日出縣西門步下石磴百餘級洩雲霧霄陡墜一綫蘚皮披裂峽束堂隍過河緣山腹而南而西而北紆曲往復咫尺變換王維詩所謂循山將萬轉趣塗無百里也余自出京都後皆望西南行至此始轉爲北過冷飯溝四丫口富莊放牛坪斑鳩巖溪口而至泥頭宿黎地產椒最辛烈又諺曰黎多風雅多雨

十六日憩林口上飛越嶺嶺高三十五里自泥頭西北附山臨澗蟻轉蛇行下老軍口復攀緣而上俯看二郎澗激洌盤渦颼颼林響岩谷奔峭霞霏閃映過高橋林口步趾益高身出度鳥之上羣峰輻輳若拱若伏古木傾欹奔泉衝射皆獲探聯臂之路咏杜甫左牽紫遊韁飛走使我高之句殆爲茲寫狀也行至伏龍寺馬定其喘人調其息惟見烟霧羃微霞飄零山如疊壁樹若珊瑚復直再躋旁嶺氣少沉霽牽馬下磴抵化林坪坪前萬山攢削峻棧崕呀中有地平衍剛可建立城垣鐵壁屹峙隘口岌業鳥道蠶叢祇通一線舍此則難飛越故坪最爲扼隘之處本唐宋以來華羌之分界今爲腹裏番漢雜處向置副將鎮戍近移駐秦寧改設都司於此是夕宿化林

十七日烈冷磧自化林坪下磴曲折附南山之棧者十五里過澗登北山繞山西北行遙望西山有碧色一彎者爲瀘江復轉而北江在山下山路甚陘不可並騎蓋始鑿山爲徑者迸星落仞阻于斗振之勢不能復寬尺寸俯臨瀘江砮崖激箭約百餘丈行者跼縮莫敢却視迤邐至瀘定橋東岸宿焉瀘水入大渡河洪波迅急石塊大小無數難施舟楫往時土人率用革船從三渡口以濟康熙四十年打箭爐歸我版圖西番諸長絡繹貢獻距化林八十里地名安樂山忽平夷有司以聞聖祖敕諭相視遂建鐵索橋東西長三十一丈一尺廣九尺施索九條索之長視橋身餘八尺而羸覆木板于上翼以扶欄鎮以梁柱皆鑄鐵爲之午前則滿鋪板午後風起減板一半狀若窗櫺以通風氣其橋中央低而兩頭昂如張正練行人

凌風跨板而過左右動搖不覺騰身雲霧中兩耳濤聲轟激心神震悚昔年欽賜佳名瀘定御製碑記勒石自是貢道廣通聲教訖遐方矣橋設巡司及把總守之

十八日過橋西北行經明正土千戶界內至咱里歷小烹大烹二壩暫憩黃草坪登大岡山高萬仞路徑陡迤盤旋而上俯矚羣山拱伏如兒孫瀘江一抹痕遙貫山脚過金釵礪約二十里峭壁千霄橫空鳥道瀘江流其下聲如萬馬奔騰棧路在山半寬者劣五六尺山壁復突出大石行者稍不戒下墜江中至此迴視劍閣連雲如平砥矣峽中少平處曰頭道水在南山最高之所瀑布湧起皎若練光是夕宿頭道

十九日憩柳楊登大小糊梯糊梯以西山勢略開江岸有地番人壘石爲礪樓相與聚居即打箭爐也本漢旄牛徼外地舊傳武侯鑄軍器于此故名康熙初歸附後以西番侵擾討平之設官兵戍守雍正七年移雅州府同知駐此爲通西藏西海之要區茶貨所聚市肆稠密烟火萬家外有瞻對喇滾把底及綽斯申單東革什咱凡五安撫司與爐接壤是夕宿於瀘公墳南達爾查及番僧酋目等以鼓樂旛幢來迎

二十日發打箭爐憩啞池塘帳宿于遮多遮多本名折多又曰藥山山高而漫平有瘴氣二十一日過遮多山憩巴拉思陀帳宿于弓把石地俱有瘴

西藏日記卷上

一一

禹貢學會  
邊疆叢書

二十二日憩銅鼓石帳宿于上巴翠

二十三日憩巴辣頂遂抵泰寧自打箭爐西南山谷中出向西北行至泰寧山皆平坦童童無草木皆沮洳黑墳不宜耕種三百里內田廬絕跡間有礪樓小竇番民皆蓬首垢面無復人形除塘兵之外鮮有華人往來泰寧番名格答雍正八年遷達賴喇嘛居此賜今名設副將及都司駐防其地兼轄化林德靖阜和寧安等營城建于東山下關四關南北羸而東西縮山趾下有礪樓數處土人所居是日至惠遠廟宣傳聖旨頒給達賴喇嘛及其弟子酋長等賜物有差惠遠廟在城外之西北南向建都岡樓三重矩而平頂上爲睥睨以樹旛旂中無門橫闌小牖下無牖前關一門西南隅翼以小戶內皆露柱無間隔惟置天井以來白光樓之上有複道通西樓別建小室數楹達賴喇嘛居之

二十四日達賴喇嘛設宴于都岡樓是日拜發奏章

二十五日余贈達賴喇嘛金帛等物

二十六日早微雪

二十七日至三十日早晨見達賴喇嘛自午至申接見大喇嘛暨諸酋長土司番人等皆賞以金帛有差

西藏日記卷下

清 允禮 撰

雍正十三年乙卯元旦在泰寧率文武官弁拜萬歲牌於都岡樓是日天氣晴和臣民懼忭望闕抒誠咸荷帡幪遠被車書文物之廣洵前古所罕見也午宴達賴喇嘛及僧徒千八百人酋長百十八人

初二日申時大雨雪

初三日晚晴

初四日達賴喇嘛進丹書于都岡樓是日給賞土司等金帛

初五日至初十日見達賴喇嘛如前

十一日道場竟賚給衆僧八百人達賴喇嘛恭修請聖安之儀

十二日立春雨雪聞雷泰寧一帶雪山處冬月即雷

十三日大雨雪

十四日微雪

西藏日記卷下

一 禹貢學會  
邊疆叢書

十五日晴晚復大雪

十六日大雪晚晴

十七日達賴喇嘛起藏經道場

十八日至二十日見達賴喇嘛如前

二十一日晚雪

二十二日如前

二十三日達賴喇嘛贖餽受其銅像畫像餘却之隨分頒從使官屬

二十四日道場竟復賚僧徒如前

二十五日見達賴喇嘛如前

二十六日恭迎上諭及賜物至

二十七日賞土司番人銀兩勞其修治道路

二十八日大風

二十九日再宴達賴喇嘛及僧徒酋長如前

三十日午時大風雪晚晴